



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

Tir, Ram Nath Kovind-i Justice NV
Ramana Chief Justice shimogo

Tripura CM Biplab Deb
dak COVID-19 putet



VOL. XVIII NO. 173 (ADOK 173) DIMAPUR YANGTEPNÜ (THURSDAY) RONGCHII (APRIL) 08, 2021 ₹ 5.00

Myanmar nungi refugee aruba osang mali: Neiphu Rio

Dimapur, April 7 (TYO): February 1, 2021 nü Myanmar nung mitkartemi sorkar Nagaland-i refugee tem aruba osang kecha mali ta Nagaland Chief Minister Neiphu Rio-i tanü metetdaksüogo. "Onoki Myanmar tebilemsü atema jembio aser tang tashi nung Nagaland-i khuret kecha majurur. Nisung kar temang anepalutsü atema, lijaliyongtsü

atema aser kar kiyimba sentongtem nung adentsü atema aru. Parnok Nagaland-i arudaktsütsü mela aser meyipa yokogo. Arrtsü adena refugee tem senzüba osang kecha mali" ta Rio-i ashi. Myanmar nungi nisung kar Nagaland nung arua jenoktsüsa kümra district Deputy Commissioner temi meimchir aria bilemba tangatetba nung yariteptsü tetuyuba agütsüogo, ta Nagaland CM-isa ashi.

Nagaland nung Class 10 tatidang tenzükogo

Dimapur, April 7 (Agencies): Bodbar nungi Nagaland Board of School Education (NBSE) indang High School Leaving Certificate (HSSLC) examination 2021 tenzükogo. HSLC tatidang ya April 21, 2021 nung atemtsü aser kaketshir ajak agi 23,612 lir. HSLC 2021 tatidang ya provisional examination centre 133 aser sub-centre 4 nung agir. Külen, kaketshir 742-i examination centre 41 nung HSLC Compartmental Examination agütsütsü.

Mongulbar nungi NBSE indang Higher Secondary School Leaving Certificate (HSSLC) examination 2021 tenzükogo. Taküm kaketshir 16835-i HSSLC Examination agütsür. Kaketshirtemji Arts 13024, Commerce 1347 aser Science 2464 lir. Kaketshir 16835 nungi tetsür 8641 aser tebur 8194 lir. COVID-19 wara ajanga NBSE-i district tem aser sub division tem nung examination centre talila lapokogo

Apr 9-10 nung NE state 3 nung tzünglu kanga arutsü

Guwahati, April 7 (Agencies): Indian Meteorological Department (IMD)-i April 9 aser April 10 anogotem Assam, Meghalaya aser Arunachal Pradesh nung tzünglu kanga arutsü ta metetdaksüogo. "Taruba ghonda 24 tsüngda Bay of Bengal nungi mopung ali atongtsü aser iba ajanga


Arunachal Pradesh, Assam aser Meghalaya nung yipru aita tzünglu kanga arutsü aser mopung aontsü," ta IMD-i ashi. IMD-i state asem nem Hokolbar aser Honibar atema 'yellow alert' agütsüogo. March 1 nungi tzünglu aruba ajanga Northeast ajungalen temekong asütsü, ta IMD-isa metetdaksü.

India nung tila tanur aika dak Covid puteta anepalpur

New Delhi, April 7 (Agencies): Covid wara mezüing adokdangbo taintem aser temang nung timem alirtem dak-ang mezüing kongshi saka wara tanaben adoka menatepa aoba nung lanur aser tanurtem dak kanga kongshir. India kübok state pungu nung COVID-19 wara tanabuba kanga prokshiba nung tanur 79,688 dak puteta lir, ta Union health ministry-i metetdaksüogo. Tangbo tila tanurtem atema vaccine balaka yanglua mali. UK nung tanurtem atema AstraZeneca vaccine tendang saka iba vaccine ajanga azü jajaba noktanger ta osangtem prokshiba sülen tendangba anena lir. UK nung tanurtem indang AstraZeneca vaccine tendangdang nisung 7 süogo. March 1 aser April 4, 2021 tsüngda Maharashtra nung tanur 60,684 dak COVID putetogo. Tanurtem rongnung parnok

9,882 tashi arishi küm 5 teküpok tanurtem lir. Chhattisgarh nunga tanur 5,940 dak putetogo aser parnok 922 tashi arishi küm 5 ser teküpokpurtem lir. Karnataka nung tanur 7,327 dak putetba nungi arishi küm 5 ser teküpok 871 dena lir. Uttar Pradesh nunga tanur 3,004 dak putetba nungi arishi küm 5 ser teküpok tanur 471 dena lir. Delhi nung aliba Ram Manohar Lohia hospital nung doctor kati ashiba agi Delhi nunga tanur 2,733 dak putetba nungi arishi küm 5 ser teküpok 441 dena lir. Tanurtem temang nung tashidak anema raratsü tashi maitba den Covid inyakyim shitak mebenshiba ajanga menateper asütsü akok ta health mongin nisungtemi ashir. Tang prokshiba Covid virus tasenba ya tashitait aser melamelaa menateper, ta parnokisa ashi.

NITI Aayog ketdangsürtemi Kiphire Aspirational District semdang



April 7, 2021 nü Kiphire DC indang Conference Hall nung NITI Aayog CEO, Amitabh Kant aser NITI Aayog Director, Soumitra Mandal nati senden amendang agiba noksa angur.

Dimapur, april 7 (TYO): April 7, 2021 nü CEO NITI Aayog, Amitabh Kant aser Director NITI Aayog, Soumitra Mandal nati Kiphire Aspirational District semdangogo. Kiphire DC indang Conference Hall nung senden ka amendang Amitabh Kant-i Aspirational District takok angutsü atema kanga meranga inyaktsüla ta ashi. "District nung terenlok mapa inyakba asadangtsü atema osang tejangga agütsütsüla. Health aser education wadangtem nung doctor aser tesayurtemi tongtipang shilem agütsüla. Anungji state sorkari Khipire nung doctor tem aser maths o science tesayurtem tekaratiba

nung mapa lemkütsütsüla. Science aser Maths tesayurtem shimtsü atema sen crore 5 agütsür" ta Kant-i metetdaksü. 2021 küm atema Aspirational Districts rongnung Kiphire District-i Health aser Nutrition nung mezüingbuba jenjang aser Basic Infrastructure nung tanabuba jenjang nung lir. District nung mapatongtem shitak inyakra terenlok alitsü aser health o nutrition sector den skill youth atema action plan alitsüla, ta paisa ashi. Tanü NITI Aayog CEO aser Director nati District Hospital Kiphire, GMS Kiphire Village, Anganwadi Centre, Kiphire Village aser ITI Centre, Kiphire semdang.

Amitabh Kant-isa USLP, Yimchunger Tribal Council aser Sumi Tribal Council teloktem den ajurutepa senden amen. Senden nung mendenji Kiphire DC T. Wati Aier liasü, EAC, Moasunep K Jinger-i tesentepertem pelaa agizük aser Department of Agriculture-i PowerPoint presentation ka sayu. Senden nung Additional Development Commissioner, Nosazol Charles; Principal Director, School Education, C. Shanavas; Mission Director (WHM); Assistant Director, Social Welfare, Talitemsula Mengusalie, SP, kin teloktem, DBs, GBs aser sorkar ketdangsürtem aika aden.

COVID-19 Nagaland: Nisung 11 dak putet; 71,515-i vaccine agiogo

Kohima, April 7 (TYO): Bodbarnü Nagaland nung nisung 11 dak COVID-19 aliba putet. Parnok züingsema nisung ajak agi 12,376 dak putetogo. "Tanü nisung 11 dak COVID-19 aliba putetogo. Parnokji Kohima nung nisung 6 aser Dimapur nung 5 lir. Külen, Kohima nung nisung 2 taneptsü nguogo" ta Health & Family Welfare Minister, S Pangnyu Phom-i metetdaksü. Nisung 12,376 nungi 11,982 taneptsü nguogo aser tang nisung 142 anepaludar, ta paisa ashi. Nagaland nung COVID-19 nungi taneptsü angubaji 96.81% dang kümogo" ta Health & Family Welfare Department Director, Dr

Denis Hangsing-ia ashi. Nagaland nung COVID-19 puteter nisung 91 asü saka parnok 10 bo tanga timtem ajanga asü. Maneni, nisung 159 tashi tanga state temi ogo, ta paisa metetdaksü. "Tang anepalurtemji Kohima nung nisung 127, Dimapur nung 4 aser Tuensang nung 2 lir. Dimapur nung nisung 4 dak shirangba yimya terara lir" ta Dr Hangsing-isa shisem. "Nagaland nung COVID-19 alitsü akok ta temolung melemba sample 1,37,507 tendangogo. RT-PCR ajanga sample 75,626, TrueNat ajanga 37,560 aser Rapid Antigen Test ajanga 24,321 tendang" ta paisa

metetdaksü. Nagaland nung nisung 71,515 nem COVID-19 vaccine (covishield) dose 93,707 agütsüogo, ta State Immunization Officer Dr Ritu Thurr-ia metetdaksü. Nagaland nung Covid vaccine agirtemji frontline workers 38,518, healthcare workers 12,293, teintet rogo 13,843 aser arishi küm 45 ser temapur 6,861 lir, ta paisa ashi. Tanü tashi nung frontline workers 17,276, healthcare workers 8,557, teintet rogo 438 aser arishi küm 45 ser temapur 248 tashi Covid vaccine indang dose anaprong agiogo, ta Dr Thurr-isa ashi.

Kohima nung nija garitem taxi ama amshiba nokdangba pelar

Kohima, Rongchii/April 07 (TYO): Kohima nung nija garitem taxi ama amshiba nokdangba asoshi RTA, Kohima dang pelar, ta Kohima Village Youth Organisation (KVYO) ajanga sangdong ka nung ashi. Nija garitem taxi ama

senzüba nokdangba nung onoki nungiter aser ketdangsürtemi iba totuyuba ya tekeratiba nung mapa kuma inyaktsü ajungshir, ta KVYO ajanga ashi. KVYO ajangasa nüburtedang nija garitem taxi ama mamshitsü ayongzük,

kechiaser itemji ozüing alema lir, ta ashi. Maneni ozüing alema senzüba taxi tem dang MV Act nung mela aliba ama tapet temerenshi agütsütsü ajungshir, ta sangdong ajangasa ashi.

India nung 'Workplace Vaccination Drive' tenzüktsü April ita anogo ka danga methitemi vaccine agütsütsü

New Delhi, April 7 (Agencies): Centre sorkari linük nung mapa inyakdak tesem (sorkar aser nija) ajak nung Covid vaccine agütsü

temelaba agütsüogo. Centre sorkari January 1, 1977 matongdang asor ajaki vaccine agütsü temelaba agütsüogo.

Arishi küm 45 ser temapur ajak Work Place nung vaccine agütsü akok ta Union health ministry-i metetdaksüogo. (Maneni tapak 2 nung...)

Tesunep aser yimchi-yimjung asoshi ajaki shilem agitsüla: Minister Imna Along



Dimapur, Rongchii/April 07 (TYO): Local Ground, Mon nung April 6, 2021 nü Konyak Aoleang benjongmung amungba mapang Minister, Higher Education & Tribal Affairs, Temjen Imna Along tesemdanger tongti ka ama dena liasü.

Konyak Union ajanga ayongzükba iba sentong nung ENPO tir Sashi Naga ya alakteta jaoker ka ama aser 46th Mon AC nungi MLA N. Thongwang Konyak ya Chief Patron liasü.

Imna Along-i Mon nung aliba nürburtem den Aoleang salem lemsatepba mapang, Konyak nungner ya jangratemtsü aketba kin ka lir, shirnok nokinketer aser tasütai kin ka lir, ta ashi.

Konyak nungertem kin ka ama tejakleni aotsü mapang tongogo aser Naga nungner renlokba nunga shilem agir asütsüla, ta pai ashi.

Nagaland state ya ano tain makum, anungji nürburtemi tezü danga malitsüla saka state nung

tesunep aser yimchi-yimjung asoshi ajaki shilem agitsüla, ta Minister Along-i ayongzük.

Paisa nürburtem dang tesüiba tebilemstü aser linük anemba inyakyim nungi pila aitsü ayongzük aser Aoleang tenüng nung tajung asoshi metsü poroktsü ajungshia liasü.

Iba sentong nung Advisor, I&PR, SCERT and Village Guards, Toshi Wungtung-i jembiba mapang, Aoleang ya tenüngsang agütsüba benjong ka liasü, ta ashi.

Pai Konyak nungner dang pei sobaliba, yimsüyimpong aser telungjem mesamadaktsütaü ajungshia liasü.

MLA N. Thongwang Konyak-i jembiba mapang alu wadang nung temoatsü bushia aser tesüiba mapatem nungi pilatsü asoshi Aoleang benjong ya amung, ta ashi. Pai Minister dang district ajungtsü asoshi maneni inyaktsü ajungshia liasü.

Kasa sentong nung Deputy Commissioner, Mon, Thavaseelan K, IAS ajanga jembiba mapang, benjongbentsü

nung sobaliba aser loktiliba indang tajung ajiteter, ta ashi.

Pai nürburtem dang tarutsü ajungtsü asoshi tesüiba mapang den sendakteptsü ayongzük aser temeim den ajemalua alitsü ajungshia liasü. Pei takum renloktsü asoshi pei dak dang keta lir, ta paisa ashi.

ENPO tir Sashi Naga-i nürburtem dang benjong balala ochi tangatetba nung amungtsü ajungshia liasü.

Temoatsü meshia aser asürtem tanüla den pilatsü asoshi Aoleang benjong ya amunger, ta Konyak Union tir, S. Howing Konyak-i ashi.

Iba sentong nung KSU tir Noklen Konyak menden liasü. Sentong nung Mon Chamber Choir ajanga tarur pela agizükba ken ka aten, Phom Community Mon Town ajanga saya balala saya liasü.

Maneni Pastor KBCM, Nahngom Konyak ajanga Aoleang temoatsü meshia sarasadem aser Chen Nokten Union ajanga Log Drum tema liasü.

India nung 'Workplace Vaccination Drive'... (TAPAK 1 NUNGI...)

"Work Place indang Covid Vaccination Centre (CVC) nung mapa inyaker kinungertem shinga vaccine agitsü memelatsü" ta parnokisa ashi.

April 11, 2021 nungi state/ Union Territory tem nung public aser private sector nung mapa inyaker nem vaccine agütsüba maparen tenzüktsü.

Nisung 100 mesüra timba aliba mapa inyakba tesemtem nung dang Covid Vaccination Centre (CVC) lapoktsü. District magistrate/commissioner lenisüba nung District Task Force aser municipal commissioner lenisüba nung

Urban Task Force ajanga 'workplaces' shimtsü.

Tang inyaka aruba ama mapa inyaker temi CoWIN sabang nung tenüng agütsütsü akok. Iba maparen ya nodal officer-i ketdangsüa reprangtsü aser office nung mapa inyaker temi atema on-the-spot facilities alitsü.

Arishi küm 45-59 tsüngda alir aiker organised sector nung lir aser parnoki sorkar aser nija office tem, mesüra manufacturing aser services nung shilem agir. Iba jagi parnok vaccination centre temi moi pei mapa inyakdak nung dang vaccine agitsü lenmang

lapoktsü ta Centre sorkari metetdaksüogo.

Centre-i April ita nung gazetted holidays dena anogo ajak nung COVID-19 vaccine agütsütsü tetuyuba agütsüogo.

Centre-i state aser union territory (UT) ajak dang CVC nung tan ita anogo ajak vaccine agütsütsü atema mapa inyaktsü shidi zülüogo.

"Sorkar aser nija COVID-19 vaccination centre ajak takok ngua mapa inyaktsü atema March 31, 2021 nü state/UT tem den senden amenba sülen iba telemtetba ya agi" ta Centre-i zülüba shidi nung shia lir.



Nagaland Chief Minister, Neiphiu Rio ajanga April 7, 2021 nü Chief Minister's Residential Complex nung Indian Red Cross Society, Nagaland nem nisung tasü mang abenba gari ka amoktsüba mapang tangokba noksa ka yangi angur. Iba gari ya Chief Minister's Relief Fund nungi aliba lir.

Dimapu District Ao GB Telongjem ajanga metetdaksür

Dimapur, Rongchii/April 07 (TYO): Rongdak nungdak kar aliba ajanga Aor GB tem ajak appointment order Xerox copy den membership fee Dimapur GB Union (Sadar) office-i April

10, 2021 tashinung bener arua agüjang, ta Dimapu District Ao GB Telongjem, General Secretary Temsupok Jamir-i sangdong ka ajanga metetdaksüogo.

Deputy Commissioner, Dimapur ajanga senden ayonger

Dimapur, Rongchii/April 07 (TYO): District Task Force for COVID-19 aser District Task Force for COVID-19 Vaccination telungjem senden ka Deputy Commissioner, Dimapur indang Conference Hall nung amentsü, ta Deputy Commissioner,

Dimapur, Rajesh Soundararajan ajanga sangdong ka nung ashi.

Iba senden ya April 9, 2021 anepdang 10:30 ako nung amentsü, anungji züngsem ajak iba senden nung arua adentsü mepishir, ta sangdong ajangasa ashi.

SIRD Director Limasenla Jamir den tepila sentong agi



SIRD Director menden nungi anisüngzükla, Limasenla Jamir den tepila sentong ka SIRD Auditorium, Kohima nung April 7, 2021 nü agidang tangokba noksa ka yangi angur.

Dimapur, Rongchii/April 07 (TYO): State Institute of Rural Development (SIRD) indang Director menden nungi anisüngzükla, Limasenla Jamir den tepila sentong ka April 07, 2021 nü SIRD Auditorium, Kohima nung agia liasü.

Limasenla Jamir ya SIRD indang Director ama küm 19 tenzükler anisüngzükler.

Sentong nung Advisor, SIRD, Fire & Emergency Services and Relief & Rehabilitation, Pohwang Konyak ajanga Director menden nungi alula dang mapang talangka nürbur tenzükba asoshi pelaba lemsatepa liasü.

Nisung ka sorkar tenzükba wadang nung mapa nung aniokba aser anisüngzükba anogo ya kanga tongtipang lir, aser anema lia mapa nungi anisüngzük angba ya takok tulu ka lir, ta pai ashi.

Pai Director menden yutsüla dang anisüngzükaka maneni department nungdak nung yariteptsü ajungshia liasü.

Commissioner & Secretary, Rural Development, Neposo Theluo-i, Director menden nungi anisüngzükla ya ajemalur, dangar dang aria bilemba molungsentü dener aser tetemjen ketdangsür ka lir, shibai nungdakba mapang la nübu agütsütsü renema alir, ta ashi.

La lenisüba kübok department nung ki-o-jen terenlok mapa jenti inyakogo aser item rongnung administrative building tasen, department auditorium, VIP Guest House tem dena lir, ta pai ashi.

Yimya tasen nung scheme aika mapa kuma inyakba, research aser training jenti akiba nung lai yaria liasü. Nagaland SIRD ya North East nung tajungtiba rongnung ka lir, aser ibai Director menden nungi anisüngzükla meranga inyakba ajanga lir, ta Neposo-i ashi.

Additional Director & HoD, SIRD tasenba Vesato-i, Limasenla Jamir ya tabensatiba aser takok ngutetba SIRD indang Director tem rongnung ka lir, ta

ashi aser küm 19 tashi lenir ka ama inyakba asoshi tenüngsang agütsü.

Lai tetsü ka ama department nung mapatem timi inyak. Lai training sentongtem tajungtiba nung yanglua agütsü aser target group atema quality research agia liasü, ta paisa ashi.

2019 küm Ministry of Rural Development, Government of India kübok 'Overall Performance in respect to Training Programmes' nung SIRD ya jenjang asemubaba nguteta liasü.

La lenisüba kübok, nübu ajema liaka department ajanga District Headquarters nung nürburtem amshitsü asoshi ki-o-jen yanglutsüba maparen tekeraba nung inyaka liasü.

Director menden nungi anisüngzükla, Limasenla Jamir-ia sentong nung jembiba mapang, küm 35 tashi mapa nung alidak mokoktetsü timtem majuradaktsüba asoshi Tsüngrem nem tenüngsang agütsü liasü.

Lar kibongi la den yaritepba asoshia lai pelaba lemsatep. La ya EAC ka ama 1986 küm service tenzük aser September 2002 nung SIRD nung arua inyak tenzük.

Külem ketdangsür aser staff tem ajanga ki-o-jen aika yanglutetogo, ta lai ashi aser maneni department tejakleni anir aotsü ayongzükba liasü.

Department nung küm 19 tashi inyakba mapang ketdangsür aser staff temi temeim sayua yaritepba asoshi lai pelaba lemsatepa liasü.

Iba sentong nung Joint Director, SIRD, Imlimenla Longkumer menden liasü, Senior Lecturer, Dr. Juthsutho Phoni ajanga sarasadem, temeja ken ka SIRD staff temi aten aser Senior Lecturer, Dr. Kedise Pucho ajanga tepela ankep o jembia liasü.

Iba sentong nung Principal, ETC, Tuensang, Dr. W. Phola Konyak aser Director, SAU, Imtoshii I. Jamir natia o tatsütsü jembia liasü.

Manipur sorkari e-autos & e-rickshaws agütsü



Imphal, April 7 (Agencies): Manipur sorkari Bodbarnü nisung 65 nem eco-friendly auto-rickshaws aser rickshaws agütsüo.

Imphal nung sentong ka nung Manipur chief minister N Biren Singh-i e-auto-rickshaws aser e-rickshaws lema agütsü.

Manipur state sorkari diesel

amshiba auto-rickshaws tejentem agientsü nükjidong nung eco-friendly garitem amshitsü tenzüksüo.

Diesel amshiba garitem ajanga carbon dioxide adokdaksür aser iba ya alima tatsükba kümdaktsüba greenhouse gas rongnung ka lir.

"Item eco-friendly auto-

rickshaws aser rickshaws amshiba ajanga state nung public senzusenbongba talila akümtsü" ta N Biren Singh-i ashi.

"Nisung 65 nem e-Autos aser e-Rickshaws lema agütsüba atema kanga pelar" ta N Biren Singh-i Twitter nung metetdaksü.

TTAADC election nung vote enoktsür 85.74 % liasü

Agartala, April 7 (Agencies): Tripura Tribal Areas Autonomous District Council (TTAADC) election nung vote enoktsür 85.74% liasü.

Postal ballots azüingba sülen vote enoktsür timba akümtsü ta Mongulbar nikongdang state election commission ketdangsürtemi metetdaksü.

Mongulbarnü autonomous district council (ADC) constituency 28 nung TTAADC elections agi.

Tan TTAADC elections nung vote enoktsür ajak agi

8,65,041 liasü.

ADC constituency 28 nungi 25 nung vote enoktsür 80 temai shilem agiogo, ta state election commission ketdangsürtemisa metetdaksü.

South Tripura kübok Shilachhari-Manubankul constituency nung vote enoktsür 90.32% liasü aser ibaji timba lir. Külen, North Tripura kübok Damchhara Jampui constituency nung vote enoktsür tajemtiba (76.64%) liasü, ta ketdangsürtemisa ashi.

BJP party-i election mapang

tim mesüi inyakogo ta opposition political party temi tai tongloksür.

CPI(M)-i ADC constituency 11 kübok polling booths 65 nung re-poll asütsü akhanger.

"Onoki osang ajak angashiba sülen telemetba ka agitsü. TTAADC election nung votes tim mesüi enoktepogo" ta Tripura Congress president Pijush Biswas-ia metetdaksü.

Vote enoker kari ashiba agi parnok indang vote tangari enoktsür liasü aser ano kari ashiba agi parnok booth centers-i meidaktsüi noktang.

Tripura CM Biplab Deb dak COVID-19 putet

Agartala, April 7 (Agencies): Tripura Chief Minister Biplab Deb dak COVID-19 aliba putetogo.

COVID-19 putetba sülen Tripura CM Biplab Deb home quarantine nung lir.

"Kü dak COVID-19 aliba

putetogo. Doctor temi ashiba ama ni kidang dang amonger. Nisung ajaki COVID inyakim sülen anidaktsü mepishir" ta Biplab Deb-i Twitter nung metetdaksü.

Northeast nungi Manipur Chief Minister N. Biren Singh

dak-a yaküm November ita COVID-19 aliba puteta liasü saka pa taneptsü angu.

Taoba Assam Chief Minister Tarun Gogoi dak-a yaküm COVID-19 puteta anepaluogo saka pa temang nung tanga timtem kar ajanga asü.

Assam Election Phase III: Vote enoktsür 83.81% liasü Congress-i 'strong rooms' nung CCTV temelaba meshir

Guwahati, April 6 (Agencies): Assam nung yashi assembly election shilem tasembuba nung vote enoktsür nisung 83.81% tashi shilem agiogo.

Assembly election shilem tasembuba nung vote enoktsür timbaji South Salmara (89.49%) district liasü aser vote enoktsür tajemtiba Kamrup (M) (74.42%) liasü.

Election shilem tasembuba nung candidate ajak agi 337 liasü aser parnok rongnung tetsür 25 dena lir.

Tongtipang candidate temji Himanta Biswa Sarma, Chandra Mohan Patowary, Phani Bhusan Choudhury, Pramila Rani Brahma, Chandan Brahma, Ramendra Narayan Kalita, aser Ranjeet Kumar Dass nung lir.

Constituency 40 nungi vote enoktsür timbaji Dispur (4,11,636) aser tajemtibaji Dharmapur (1,41,592) lir.

Assam Pradesh Congress

Committee (APCC)-i Assam chief electoral officer Nitin Khare dang 'strong rooms' nung CCTV surveillance asütsü temelaba meshiogo.

"Election agia arudang tesem balala nung EVMs dak sendakba tatalokba balala ajuruogo. Anungji EVMs kümzüka ayutsü kanga tongtipang kümogo. 24X7 strong room agents' surveillance facilities alitsüla aser CCTV surveillance temelaba agütsüba ajanga election tiptema agiogo ta sayutsü" ta APCC president Ripun Bora-i shidi nung zülü.

"Patharkandi BJP MLA indang gari nung EVM machines abenba atema Election Commission-i osang jangjatsütsüla aser kechiba pa mapur? Election Commission-isa EVM mapa meinyakba aser meimlaba tesemtem nungi EVM ngutetba indang osang tejangja agütsütsüla" ta Bora-isa takhangba agütsüo.

Conrad & Joykumar nati Garo Hills nung nübo ayim

Shillong, April 7 (Agencies): Meghalaya chief minister Conrad K Sangma-i Manipur deputy chief minister Joykumar Yumnam, Rakkam Sangma aser Siju Rongara MLA nung den Chokpot, South Garo Hills nüboyimba senzüo.

"Congress-i Meghalaya nung küm 10 sorkar yimsü asüadang terenlok balaka bener marutet saka NPP-ibo küm asem tsüingda Garo Hills aser state nung terenlok bener aruogo" ta Conrad Sangma-i o jembidang ashi.

Rakkam Sangma-ia Chokpot nung alirtem dang yimtenren tensa tajunglen adentsü aser

taruba election nung NPP nem vote enoktsütsü ayongzük.

CM Conrad-ia Rongrikkingre GHADC constituency nungi NPP candidate Wenison Ch Marak atema sentong aika nung nüboyimsü.

Manipur deputy chief minister Joykumar Yumnam-ia o jembidang asür PA Sangma-i Indian politics nung shilem agiba bilemteta jembi.

"PA Sangma ama yimsüsür tajung ka alibaji Garo Hills nung asoshi tia taka lir kechiyong pa Northeast ajungalen akhümtsübur" ta paisa metetdaksü.



Bodbarnü Arunachal Pradesh chief minister Pema Khandu-i Namsai district nung 'Trans Arunachal Drive 2021' tenzüksüo. Iba sentong ya Arunachal sorkari 'Dekho Apan Dosh' campaign nung shilem ka ama nungita yarir. State nung tourism ajungkettsü aser tourist circuits renlokaktsütsü atema 'Trans Arunachal Drive 2021' sentong ayonga agir. Tanü Namsai nung aliba Golden Pagoda nungi iba drive tenzük aser shilem agirtemi anogo 21 tashi tourist tesem 10 sema senzür April 19, 2021 nü Tawang nung sentong tembangtsü. (Namsai, April 7)

GOVERNMENT OF NAGALAND PERSONNEL & ADMINISTRATIVE REFORMS DEPARTMENT (PERSONNEL 'B' BRANCH) C I R C U L A R

Dated: Kohima, the 07th April, 2021

NO.PAR-B/7/2007 NPSC : : Applications are invited from serving officers under the State Government holding analogous post or immediate lower pay level for filling up of the post of Controller of Examinations on deputation in the Nagaland Public Service Commission in Pay Level -16 (79,900-1,93,700) per month and all other allowances as admissible under the rules in force in Nagaland.

Eligibility criteria are as follows:

- Post graduate in any discipline having adequate experience in conducting examinations.
- Must already be serving in Pay Level - 16 (79,900-1,93,700) per month or at least 5 years in the Pay Level - 15 (67,300-1,89,300) per month.
- Candidate with higher scale will be given pay protection.
- The period of deputation shall be for 03 (three) years.
- All application should be recommended by the respective Controlling Officers of the Department.
- The Application may be addressed to Principal Secretary, Personnel & Administrative Reforms Department, Nagaland Civil Secretariat, Kohima. The last date of receiving applications will be 06-05-2021.

Sd/-

(J. ALAM) IAS

Chief Secretary to the Govt. of Nagaland.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 08, 2021

NAGA YIMTEN KARAA LATETTSÜLA

Tang Nagaland nung People's Democratic Alliance government kümer küm asem ajungba anogo nung Chief minister, Rio-i tanungba küm ana tsungda Naga yimten tebilemtsü ya tatem kuma latettsü asoshi meranga inyakdagi ta ashiba jagi ano asenok nem maneni teimla agütsür. Tamalena, Nagaland nung mezung paisa NPF teloki anir government akümba küm 2003 nung Naga yimten tebilemtsü tatem kuma latettsü asoshi ken o shitaklen jembia odagi ta teimla ken o ka metetdaksüba bilemteter. Ibaji ser küm 17 süio saka ano tang tashi ken o shitaklen jembia aobaji tatem metongteti lir. Atangji, Naga yimten ken o tatem bang kuma latettsüba ya mapa kanga tasak ka lir, kechiyong ken o asakba dang masü saka Naga nunger yimten nüchiso bushir telok inra akümba yagi tebilemba aser nukjidong dena balala kümogo. Ano, tang amaisa Naga yimten ken o ya melatetteti ora, ashiko, telokang teimba akümtsüa akok aser lia liabo Naga yimten nüchiso asoshi masü saka Naga nunger o Naga nunger na tsungda ali aser saru atema kati ka amak tenzüksü. Iba ama tensa tia tamajungji paidoktsü atema Rio-i ashiba amaji, nüchisosa masüyonga aser Naga nunger lushi ajak yimten ka kuboksa melongjemtetaka, Naga nungerji India kuboksa süaka tangar India nungertem dang nungi lipok aser sobaliba kenyongi balala ta alimai metettsüsa yimten aser loktiliba jenjang balaka nung latettsüsa, ajak ajurutepdak lenjem ka bushitsüla. Iba ama tangatetba ka nung tangsa tang Naga yimten ya melatettetra, ano Naga yimten asoshi nokdakba ya tang dang nungi tashimaitba aotsü. Asenoki Naga yimten nüchiso asoshi rarayonga aruba mapangtem indang bilemdangra, Naga nunger tashitemetertetermi anir Naga yimten nüchiso jenjang ka latettsü atem apuso aser iba tongpang nung Naga nunger kibong shiai mulungsua saru agüja shilem agi. Aji oda, Naga nunger lanurtemi tetsü tasolima asoshi pei taküm tenla agütsüsa mapayui linük tenzükba mapa nung mulungsua shilem agi. Parnok arem nung lia pei tetsü taso lima meimba nüchiso ken aser pei ki, pei yim aser pei tedongdenji menungraba linük aser nuknarar ken mejema aten. Item kentem jagi nübortem mulungjang nung pei lima tali meima kümdaktsü. Iba ama tensa tia denji tanü asenok tensa medemdangra, tanübo linük nüchiso asoshi raraba temenungratsü kentemto mali kümogo. Aji oda, tanübo linük nüchiso asoshi raraba indang ken mejemdi asüyonga, kechi o aser kechi ojang enoka mejemtsü? Tanü asenoki mejemba kentemji ochimashi aser tashiyim agi alima shirangdaksüba kentem dang lir. Joko, asen lima nung shingaia nüchiso ken memejemer aser tadena matener, itemji asen mapang aser mapatem dak mapet kümogo. Joko, tanü lanurtem rongnung Naga yimten asoshi raratsü atema jangrar masü saka India sepai akümtsüang jangrar teimba kümogo. Aji oda, kibong ka nung ka Naga sepai aser ka India sepai ta ser kechi koda asen tetsü tasoli nüchiso atema jembitsü? Linük tenzükertem chirnurtemia dena Naga yimten nüchiso atema raraba mapaji senmang kuma agizüksü memulunger, kechiyong idakji tarutsü teimla tajung ka mesayutetter. Itemji kodang asenoki asangsang nung bilemdangdir, tangbo joko asenok ya India den masü saka asenok o asenok na tsungda nüchiso bushiteper amai kümogo. Joko, nübortemi Naga yimten nüchiso tenung nung saru tesaru ta odia ola adoker aser ano külen India sepaitemi Naga yimten nüchiso tenung nung saru sarurtem maksüja pushia amshia sayur. Ano, külen küm pongo shia kecha timtem aser tenokdangba melii India temzung kubok election agir aser Naga nungertem India wako songer nümadangdanga senzür. Itemji taintemibo angatettsü aser angalemtsüa akok saka tanü asung lanurtem asoshibo temangmangtsüka lir. Aji oda, asenok rongnung tang dang nungi tebenjaba mebenjadang aser ano akhi ama azütokshi lendong matalokdang, Chief minister, Rio-i ashiba amaji, kechisüdir süaka Naga yimten tebilemtsü ken o ya tatem bang kuma karaa latettsüla. Atangji, Naga yimten ken o dang masü saka alima ajunga nung yimten ken o ajaki mulungba nungbo melatettter, kechiyong aji kanga tasak aser aiben tamakoktsü akümer. Iba tangatetba nung, Nagaland nung yimsüsürtemia Naga nunger linük tenzükter teloktem balala lemsar India den ken o jembia alidang, ajaki akümketa agizükttetsüsa yakta ken o latetang ta kisung rongshibaji masü, saka ken o tatem kuma latettsü asoshi shisa lenmang karbo sayutettsüla. Shibaibo nübör ajaki junger ta asütsüsa ken o melatetner, saka ibaji jembitsübo temela saka mapa agi inyaka sayutsü temela masü. Aji oda, asenokibo kecha shisa lenmang kata mesayutsü saka yakta ajaki mulunga agizükttetsüsa telemtetba ka bener arung ta dangsa shira, telemtetba maginüba agi tenung tajung agia tamakoktsü ka akanger asütsü. Ajisüaka, Naga yimten tebilemtsü ya ali tashi Nagaland nung yimsüsür akümbaji tiyazü asütsü aser takar akümbaji nükenblemtsüang asütsü.

OLEMSABANG

Ao kin nungi samaro aika adok?

~ S.Nuken Longkumer, Naga United, Dimapur

Ans: Air rongnung nungtugo liner aika adokogo. Lukesosang ama, P. Shilu Chief Minister ama, Dr. Imlongliba, Sashimeren ama, L. Kejung ama, Aliba Imty ama, Imkongmeren ama, S.C.Jamir ama, Dr. Bendangwati ama, N.I. Jamir ama, Rev. Longri ama, Kiremwati ama, tepang agi jembitsü makokba liner aika adok, par mezung liner nem aküm tulu agutsüdi, par mapa tajung asenok mulungjang nung yua lir, item teok nung obalabo maden saka onok jangratema arishia lir, tarutsü mapang Aokin nütsung renloka aodang liner tajung aika adokjang ta Tsungrem dang sarasademdi. Oztü agi ashiba yamai bilemteter, Lukesosang Mangmetong tashitait samaro taküm tashitemeteter ka liasü. Mokochung (SDO) Civil aliba tensa shab table nung teka agi tsunga rara ta ashir, British Govt. merena aliba mapang ola dango tashi agi jembira jail nung ayuba tensa, tetsübu mapang anasa mokdaksübo oztü maka, saka pa samaro asünung metsübu rara aser takokangu ta ashir, pa ya Napoleone ama tashitait taküm ka liasü, par putu alima amunga British Govt. wangshiba mapang liasü, tanü par taküm aika asen den mali, saka par mapa tajung teti bilemteter, jangratemer? Külen tsütsü repranga ora, Kohima D.C den A.Z. Phizo-i kanga sashia raraba oztü lir, iba sülen pai D.C tang yamai ashi ta angazüker, repranga atang nü kima künü anogo bomb tulu apoktsü, DC shab-i mamangtete kanga menütsü ta angazüker, ibaji shidak atalok ta oztü ashiba bilemteter, süitema aoba mapang tanaben meyipa mangutsü saka oztübo taküm lir. Oztü aika lir, saka Alobkai pa kinungtsü süpite ali nung tsükba angudang pa temulungjang ajak raksaba to oztü tatem lir! asen linertemi mapa tajung inyaka yutsüba teti bilemtettsü??

Ao kin ya temulungjang ka dang kümer sendong ajak inyak nungbo tangar kin tanungba ya koda alitsü? Tsungrem sendong ya tesungmangtsü olura! Iba yongji taoba mapang Germany ana kuma lemsa! Par lima lungjema dok nungbo tangar lima ya ajemshitsü liasü! Atom bomb yanglutetsang ya Germany senso ka liasü ta ashir! India lima UP nung MP 80 tashi liaka parnoki lungjema maliba ajanga tanungba statetemi parnok anishiba ama lir! oztü angatetsü asoshi metsü ya tanang lir, chiongtsü ajak nung metsü melira takitsü mali! saka metsü tali amshira chiongtsü ajak raksar tachitsü majung! Metsü ya alima aser meimchir asoshi kanga senti aser tongtepang! Yamaj imetsü tanang pa metenra chiongtsü ajak amajok akümer! Aier asangur ya metsü ama lir, chiongtsü nung tali inoknungbo tachitsü majunger indoktsüsa akümer! Anungji metsü ama aier asangur alimai aginüba mapang nukshiba mapang nü taküm arem nung aliba mesü ama tekümdang liang. Kuyi aser molusungzüi na achitsü repranga lir! yamaji tapayutsü aier chanu taküm aika chiadokogo? Tanaben meyiba marutet? Entsü ali nung tsük ama aküm!

MOKOKCHUNG NUNG POLYTHENE BAG

- Talitemjen Imchen

Nagaland nung polythene bag mamshitsü ozung liaka, tang tashi nung kanga junga azüoktetbaji Mokochung yimti ya asütsü ta nibo bilemer. Ibaji administration ajungba agi dangbo masü, saka nüpurtem-i talenba ozung tetezü metetba agi lir ta Mokochung nung alirtem dang nibo kanga pelar.

Ni February ita tom ka nung hopta ka shi Mokochung amongba mapang, mezung shishilemadaki aodangbo kanga timtem ajuru. Kechiaser dokan nung amenertem-i osetji paper nung dang aleper agütsü. Shishilemadaki aodang süpong bener aobaji yimya mesüba. Dimapur nungbo polythene bag ka nung taliba osetji inoktsütsü aser ano ki metongjungi dokdangalir ta bilema, ano polythene bag kati aputsür. Aser ni Mokochung nungjia iba yimya nungji dokan kibur jagi inyaksütsü ta bilem. Ni parnok dang polythene bag asungdangba mapang, meyiper parnoki na Mokochung nung alirbo masü na ta asungdang. Kechiaser Mokochung nung alirtembo iba polythene bag mamshitsü yimyasüpaoko.

Yaküm küm March ita nungi tenzuka corona menatsü tsübuba agi, kodangsa kima ayazüktir mesüra nisung ana aser tema ajuruteptir, mask bilemteter. Iba amaji Mokochung nung tananü puba shishilemadaki aodangbo ni süpong abentsü kidang bilemtet. Ibaji dang masü, kodang shishilemadaki aotsü kidang renemtir, oset balala alitsüba yimya nung süpong balala abentsü bilemtetdaksür.

Nisung shia süpong sentsü balala bener shishilemadak angubaji jangratemtsüka aser tajinütsüka. Mokochung nung polythene bag mamshiba ajanga lipüküm kümzüka ayubaji dang masü, saka alimaji kanga dang merüka ngudaktsür. Ashiko Nagaland nung yimti rongnung, Mokochung ya temerükba asütsü süti ta nibo kanga menürema bilemogo.

Tanga yimti nung alirtem, nenokia kecha meratai Mokochung-i odangang. Ni anguba dang nungi nenoki tajungba ajitettsü. Saka Mokochung shishilemadaki aodangba kidang süpong abentsü teti bilemtetangma.

Dimapur nung alir medemertem-ia polythene bag kümdanga amshiba angudang kanga tenük sünga repranger. Yamaji mapa tajungji aikati tenzükter masü, saka tangateter kari dang tenzükter aser takok angur. Anungji ajaki mapa tajungbo tajungsanga ajizüktepa benshitsü nia ayongsemer. Kanga pelar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Indonesia nung tzümetzüng agi kongshirtem yaritsü Arogoi mepishir



Taoba hopta Indonesia nung Khristan nütsüng aika aliba East Nusa Tenggara province nung tzümetzüng aser anentsüh lendong atalokba sülen lendong agi kongshirtem Malaka district nung aliba Catholic shelter ka nung jenoka aliba noksa nung angur.

Jakarta (Indonesia), Rongchii/April 07, 2021 (Agencies): Easter Sunday nü (April 4, 2021) Indonesia linük nung Khristan nütsüng aika aliba East Nusa Tenggara province nung tzümetzüng aser anentsüh lendong atalokba sülen linük nung tongti putiri iba lendong agi kongshirtem yaritsü mepishia metetdaksüogo.

East Nusa Tenggara province nung tzümetzüng aser anentsüh lendong atalokba sülen lendong agi kongshirtem nisung 4,000 dak tema tang East Nusa Tenggara province kübok Malaka district nung aliba Catholic shelters nung jenoka lir.

Jakarta nung tongti putir, Ignatius Suharyo Hardjoatmodjo-i Khristantem dang item lendong agi kongshia alirtem nem teyari agüjang, ta mepishia metetdaksü.

'Seroja' ta ajaba yipru mopung tesashi ajanga anogo ananü tashi tzünglu maneni arua liasü, aser ibaji ajanga Easter Sunday nü East Nusa Tenggara province nung yimti aser district 12 nung tzümetzüng lendong den külemi anentsüh lendong nung nisung 128 süogo, ta National Disaster Mitigation Agency-i metetdaksü.

Nisung 72 shi samaogo aser ki 271 den public kiojen 99 raksaogo.

Iba lendong atalokba sülen Khristan nütsüng timba ser nisung 8,000 dak tema ainshidakja shelters balala nung jenoka lir, ta osang ka ajanga metetdaksü.

April 7, 2021 nü Indonesian Bishops' Conference Chairman, Suharyo-i YouTube video ka ajanga Khristantem dang, "Indonesian Bishops' Conference tenüng nung ni nenok dang East Nusa Tenggara province aser West Nusa Tenggara province tesem kar nung lendong agi kongshiba asen adianutem dang temeim sayutsü mepishir," ta metetdaksü.

Paisa, senotsü teyariji Caritas Indonesia, Commission for Socio-Economic Development, Dioceses' Commission for Social Communications aser Jakarta Archdiocese's Lembaga Daya Dharma dangi yoktsü mepishir, ta metetdaksü.

Temeim mapa sayuba ajanga asen tamang jenjang kuli sayur aser ibaji ajanga asen adianutem aser aianutsürtem moatsütsü, ta pai metetdaksü.

Kasa video nungjisa Sacred Heart of Jesus Arogo nung tongti putir aser Caritas Indonesia Board Chairman, Aloysius Sudarso-ia, "Indonesia nung Catholic Arogoi ola madoki malitsü. Timtemertem anepalubaji ajanga asen tamang jenjang sayur. Asenoki Easter mongogo aser iba ya Yisu ajanga Tsüngremi meimchirtem atema inyakba kuli lir," ta ashi.

Osangbener den jembidang Caritas Indonesia nung Executive Director, Fredy Rante Taruk-i, tang tashi nung onok dangi rupiah sen billion I tenla aruogo, ta metetdaksü.

Paisa, "Onoki ita ka tashi tenla bendentsü, kechiyong teti agia onoki tenla sarutetbaji ajanga rehabilitation programs-a agir," ta ashi.

"Caritas Indonesia-i Arogotem indang Commissions for Socio-Economic Development den senteper takoksa angurtem nem teyari balala agütsür. Onoki iba commissions dang kinü tanur, tetsütem aser tanür-tamburtem dak-a rangloker inyaksü mepishia arudar," ta pai ashi.

Osangbenertem den jembidang Indonesia Disaster Mitigation Agency otongdar, Raditya Djati-i,

"Anentsüh agi nisung aika anebanga alitsüa akok ta onoki bilemer. Tang tashi nungbo nisung kwi samaar onoki tejangja memetet," ta metetdaksü.

"Sub district aika nungi nisung noklang aika ainshioigo saka aika kidang dang mongdar. Parnoki mozü, tzü aser blankets nungdaker," ta paisa metetdaksü.

Indonesia Tir, Joko Widodo-i asür kibongtem den mangyim jashi lemsatepba den külemi nüburtem dang ketdangsertemi tuyuba ajak bentshitsu metetdaksü.

"Relief mapa tekaraba nung inyaksü ni tuyuogo. Prokshia alirtem nem health services agütsüba den külemi parnok nungdak balala peritsütsü aser lendong ajanga teraksatsübatem tekaraba nung yanglutsü ni tuyuogo," ta metetdaksü.

NBCC Youth Dept-i tatidang agütsütsüpurtem atema sarasademtsür

Kohima, Rongchii/April 07 (TYO): Nagaland Baptist Church Council (NBCC) Youth Department-i Nagaland Board of School Education (NBSE) HSLC aser HSSLC Examinations (April 6 nungi 29) agütsütsüpur kaketshir ajak asoshi sarasademtsür, ta Mongolbarnü NBCC Youth Secretary, Rev. Vikuo Rhi-i

sangdong ka ajanga metetdaksü.

"Coronavirus wara aliba ajanga tensa balaka nung nenoki tatidang agütsütsüsa kümaka nenoki merangba inyakba nung takok angutsü atema onoki sarasademtsür, iba dak alia Tsüngrem dak amanga tatidang agüjang. Tsüngrem temeim ajanga

tatidang piyong nenok lenitsü aser tarutsü atema nenok jenjang junga latettsü ta onoki amanger," ta sangdong nung shia lir.

Onokisa kaketshirtem aser tesayurtem dang wara anema state sorkari tuyuba telatetba ajak shidak bentshitsu mepishir, ta NBCC Youth Department-isa mepishia metetdaksü.

ANOGO ABEN TSÜNGREM DEN

Aser Peter

"Saka oang, pa nütsüngtem asr Peter dang shiang; aser pe nenok dang tama Galil-i odagi; aser pai nenok dang shia aliba ama idakji nenoki pa angutsü." (Mark 16:7)

Tatishitsü agi telok ka dangi tejaokba shity ka yok, aser iba shity nungji telok tenüng ajener 'aser' ta sür ne tenüng 'Mr/Ms.....' ta ajener kodang ngudir naji iba telok nung maden, saka na-a iba sentong nung tongti ka ama jaoker ta angateter. Iba amaji Yisu-i pa tasü nungi shia arur nütsüngtem den ajuruteptsü asoshi Galil-i jaokdang kotak tenyari otongdadang nütsüngtem den Peter tenünga tetshia jase. Peter ya nütsüng rongnung dena mali, asü no? kechiba pa nütsüng rongnung maden amai jaoker? Laishir kari ashiba agi Peter-i Yisu asemben menangzüki Yisu ashioktsüba ajanga pa Iskariot Yihuda ama nütsüng rongnung medeni liasü. Iba taitüsüba nung pa kanga tipmedemi liasü. Pater-i aibelenyonga Yisu-i Galil nung pa ajurutsü jaok.

Peter ama asenoki Yisu aiben menangzüker, aiben pa ashioktsü, aser tashi mangai pila aor. Saka Yisu-i aibelener nema pa den ajuruteptsü maongka lapoktsü. Tanep nai naji aibelener ka ama züngshira Yisu-i pa ajurutsü "aser" ta sür ne tenünga jase. Iba osang tajung jagi asenok nem tanaben teimla tasen ka bener arutsür.

Sarasadem

Temeim Yisu na ama tamakok nisung dang nai ne dangi arutsü jaok nung kanga pelar. Ni samar alidang ni iba taochi aser yimlibilem ngua ne tenüng asanger. Amen

Easter Sunday nü Baptist Arogo ka nung pastor jala kaset



Pastor, Rev. Michael Yarbrough aser par jala, Areyelle Yarbrough na noksa nung angur.

April 07, 2021: Easter Sunday (April 4) aonung Birmingham (US) nung aliba Baptist Arogo ka nung pastor jala kasetba aser tanur pongu yirutsüba sülen Radio Personality, Rickey Smiley aser Birmingham Mayor, Randall Woodfin na densema lenir aikati iba tatalokba aitsüogo.

Easter Sunday aonung 7:00 ako meta Shady Grove Missionary Baptist Arogo nung pastor, Rev. Michael Yarbrough'er jala arrshi küm 32, Areyelle Yarbrough dak tekolak nung injang khaloktsü; iba dak alia tanur pongu (arrshi küm 21, 17, 16, 15 & 4) injang agi yiru. Parnok rongnung arrshi küm 16 tebur ka tepi nung injang agi khashi aser tetsür ka teku nung khashi.

Pastor jala, Areyelle Yarbrough ya county manager of principal accounting nung mapa teinyakdak liasü aser Easter Sunday anepdang tekülem sentong nunga lai ken ka tena liasü. Aonung 7:00 ako meta la injang agi yiruba sülen minute

33 shi lirbo süadok. Iba dak sendakba nung Shady Grove Missionary Baptist Arogoi sangdong kecha magütsü saka pastor kibong junga meteta alir aser Radio Personality, Rickey Smiley-i la kasetertem shibai putetdir senpet US sen 5,000 agütsütsü, ta sangdong.

Osangbenertem senden ka nung jembidang Smiley-i, "Tanü ni kanga jashir. Nüburtemi iba tatalokba anema nokdaksüla. Iba ken o ya police department nem agütsütsüla aser nisung tepseter ajak aputsüla," ta ashi.

Birmingham nung Mayor, Randall Woodfin-i, "Pastor jala kasetba atema ajaki jashitsüla aser mangyimtsüla. Tai maket arrshi küm 32 tetsür ka kechiba tepset. Easter anogo nung la Park nung südoksünema amongdang kechiba la tepset?" ta ashi.

Tenük kuli alir kati ashiba agi, Park nungji nisung 1,000 shi pei kibong züngsemtem den kazüba mapang nung nisung kari injang khalokja liasü.

OLONG PAITEP # 5775

1		2		3		4	5			
				6						7
		8								
9				10		11				
			12					13		
						14				
16						17				

TIPLÉN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S_ _ _ i	- (3)	5. Yim lenmang	- (5)
9. Nisung rongnung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Kenyongi majinü	- (5)
13. Tsük rizüngdak	- (3)	13. Rong kanga tulu	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 5774 TELANGZÜBA

TIPLÉN :		LANGTSÜNGLEN :	
1. Tanga, 6. Wara, 7. Rajang,		2. Anga, 3. Yabang, 4. Tarok, 5. Orak,	
9. Anük, 10. Jenjang, 11. Alar,		8. Ainer, 9. Anema, 10. Jabili,	
14. Ngashi, 15. Nala, 16. Mechi.		11. Among, 12. Miim, 13. Anem.	



PARA KI AKAR MALIK TEM DANGI :

Alokba : Oh para ki akar Malik tem ajaki jungjunga tenoktenoka angangnih.....

- Ki makaba agi nur nem para agüja alir, nai talangi motetaka nur ki para nung alirtem dang Tsüngrem temeim sayutsü talubosa lir, Saka nur para nung alirtem jagi naji shiba ah ta ashir.
- Küm shia para atuba anenang, Sentep kidangbo San chanu, Sarasadembo yisuji tangsa alutsü ama sarasademteter, morumora, rongsen benbuba nungbo, na number one, ki tazüng lir ta pelashishia lidaktsür, aruli maruli nung para meyrjang ka bora tur küm shia meyrjang kaka atunungbo shibai aremtsü.
- Tema tereprangtsübo yisu, nisungi angutsübo tajung, saka nu molungbo leper dang tamajungba, ta nur ki para nung alirtem nemnembaji kodak tashi tudarji, nai aremdima..... Tali tabong merumora tesuma.. Nur timtemdangbo, nur nem para agüja alirtem jagi dang yaritsüako..... Market nung jenjang atur ta sur para atubaji time masü.

Sobangba : Alok,na para kidang alira nah!

Alokba : Masü, nibo ozü kidang alirakoh., Saka medemertem atemaji bilemtsür athi...

Sobang : Odang tokjang, parnok paraji tuli, sugar, pressure ji tali tuli, hospital nungji indokli ta asütsüah aji, Ozü kibur bo onok joko küm 7 jungogo, para matur,mezüng koma liasü aji dang.

Alokba : Ohoooo, nur kibur to sentepi kangabo maor, aser Revival nung majajar, iba jagi morumoru mali, tangar jakla mangu athi.....


Oh Alokba.....

Lilir : Aienla Ao

AO OSHI ANGAZÜKDAK:
TANÜ ANGAZÜKTSÜBA OJANG

Aürr
 (v) ajem nung ang rüoker süoshi ajentepba yangluba
 * Kütsüi onok süoshi ajak aürr.


Aürr
 (v) ak chi asoba (cook for pigs)
 * Kübui anepdang shia ak chi aürr.



Tir Yimyim

Tepela Tasoba Anogo

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.



1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

TANÜBO NAI LANGZÜANG

Q. Koba küm International Children's Book Day tenzük?
 A.1965 B.1967 C.1969 D.1971

(Taruba adok nung onoki langzüksü)

YASHI ADOK TELANGZÜBA : Sri Lanka

SUDOKU # 5818					TELANGZUBA # 5817												
		7		1		2	5	1	6	8	4	7	3	9			
		6	9	8	7	2		7	4	8	9	3	5	6	2	1	
2	3			7	4		5		3	6	9	2	1	7	5	4	8
6			5		4		2		1	9	7	5	2	3	4	8	6
5				4	6		3		5	8	3	4	6	1	2	9	7
1		8			2			6	6	2	4	8	7	9	3	1	5
		9		6		8			8	7	6	1	4	2	9	5	3
		1			8	9			9	3	2	7	5	8	1	6	4
		6			2	5			4	1	5	3	9	6	8	7	2

OJANG LUTEP # 5362

LAIMA :

TAABA :

MAKDTALOANG :

BOKAR :

SÜBMAA :

MANLENG :

UNNG :

EMOKAJA :

MTAKÜ :

AKSRAR :

OJANG LUTEP TELANGZÜBA # 5361

TELOK NUNG TULUR TILAR AJAK KENÜ MESÜRA KENÜBO NÜNGDAKA AKÜMER

TAN HOPTA ATEMA - KOMA SÜLA ?

Q. Myanmar nunger nübortem par lima nung sepaitem tsübuba agi süngjema melitet, parnok meyrirjang anasemka Nagaland nung khen atema tejenokdak bushia arua nunga koma süla ?

Olong 20 shi nung April 09, 2021 tashi nung iba telangzuba ya onok dangi (e-mail - tiryimim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzubatemi taruba Honibarnü adoktsütsü.



Jammu, April 07, 2021: Maoists telungpurtemi pua aliba CRPF Commando, Rakeshwar Singh'er kinüngertem aser medemertemi Jammu Poonch Highway mokdang pa chioktsü atema takhangba agüja longkak aitba noksa nung angur.

WB, TN, Kerala, Assam, Puducherry exit polls April 29 nü sangdongtsü

New Delhi, Rongchii/April 07 (Agencies): Mongolbarnü Assam, Tamil Nadu, Kerala aser Puducherry nung Assembly elections tembangogo aser West Bengal nunga election shilem tasembuba agir ano shilem pongu anünga lir.

Bengal nung election shilem tatembangbuba April 29, 2021 nü tembangtsü, aser kasa anogo nungsa state pezü den UT ka nung exit poll osang sangdongtsü.

Election Commission-i April 29 aonung 7:30 ako tashi exit poll mesangdongtsü metetdakja lir saka iba sülenjibo sangdongtsü. Election agiba states ajak nung May 2 nü vote azüngtsü. Exit poll ya nüburtemi vote agütsüba asadanga survey ka lir.

Tamil Nadu nung election tesünep nung agiogo aser

voters shilem 71.79-i vote agüja liasü. Mongolbarnü Tamil Nadu nung constituency 234 nung election kanga tesünep nung agiogo, ajisüaka state tesem kar nungbo electronic voting machines (EVM) nung timtem adoka liasü.

2016 küm Tamil Nadu election nung voters shilem 74.24-i vote agüja liasü aser tan election nung voters shilem 71.79-i vote agütsü.

Puducherry UT nung voters shilem 81.64-i vote agütsü aser election tesünep nung agiogo.

Kerala nunga voters shilem 74.2-i vote agütsü; 2016 küm election nungbo shilem 77.35-i vote agüja liasü. Kerala nung LDF aser UDF teloktep na tsüngda kanga atongtepa toktep aser constituency kar nungbo BJP-i aniba NDA-ia tanga teloktep den kanga atongtepa

toktepogo.

Assam nung election shilem tatembangbuba nung voters shilem 82-i vote agüja liasü. Assam nung election shilem tasembuba (tatembangbuba) nung menden 40 atema election agia liasü. Assam nung election shilem tasembuba nung tetsür 25 densema candidate 337-i toktepogo.

West Bengal nungbo election shilem tasembuba agidang nisung ana asü, candidates pongu anema inyak, parnok meyong gari raksatsü aser polling agents kar dak züka liasü.

West Bengal nung election shilem pezübuba (menden 44 atema) April 10 nü election agütsü, shilem 5buba April 17 nü, 6buba April 22 nü, 7buba April 26 nü aser shilem tibuba April 29 nü agia election tembangtsü.

Coronavirus wara yaküm dang nungi tekaraba prokdar: Centre

New Delhi, Rongchii/April 07 (Agencies): Tang India nung coronavirus wara kanga prokba mapang nung Centre sorkari, coronavirus wara ya yaküm dang nungibo tang kanga tekaraba prokdar, ta metetdaksü.

Bodhbarnü Centre sorkarisa, linük nung iba wara prokba nokdangtsü atema taruba hopta pezüji kanga tongtibang asütsü, anungji iba wara anema raraba nung nüburtemi tongti shilem agütsü, ta mepishia metetdaksü.

Osangbenertem senden ka nung jembidang NITI Aayog Member (Health), Dr V K Paul-i, linük nung iba wara tensa kanga mejungi kümogo aser senso aika iba tashidak menatsüsa lir, ta metetdaksü.

"Iba wara anema raratsü asoshi hadirtemji kasa dang-covid telatetbatem shidak

benshitsüla, wara nokdangtsü atema inyaktsüla, nisung aika dak tendangtsüla, medical infrastructure tajungba akümtsüla aser vaccination mapatong tekaraba inyaktsüla," ta pai ashi.

Coronavirus anema telatetbatem rongnung mask agiba aser lokti nungi pilaa aliba densema lir, ta pai nenshia metetdaksü.

"Iba wara tamajungba kümndar aser taoba mapang dang nungibo tang tekaraba prokdar. State karbo tanga state dang nungi tamajungba," ta pai ashi.

"Wara tanaben prokba nokdangtsü atema nüburtemi shilem agütsüji kanga tongtibang. Taruba hopta pezüji kanga tongtibang asütsü. Linük nung nübur ajaki longjemer iba wara anema raratsüla," ta paisa metetdaksü.

(Maneni tapak 9 nung...)



New Delhi, April 07, 2021: New Delhi nung aliba market ka nung nisung kati mask junga magiba agi pa dak coronavirus tendangtsü atema Civil Defence volunteers-i apuba noksa nung angur.

Tir, Ram Nath Kovind-i Justice NV Ramana Chief Justice shimogo

New Delhi, April 07 (Agencies): Linük Tir, Ram Nath Kovind-i Supreme Court judge, Justice Nuthalapati Venkata Ramana, Chief Justice of India (CJI) shimogo.

April 24, 2021 nü Justice Ramana-i linük nung 48buba CJI inyaktsü atema tenangzükba agiba sülen pai küm ka ser ita pezü CJI

inyaktsü.

Justice Ramana ya Andhra Pradesh kübok Krishna district nung aluyimer kibong ka nung aso. Pai mezüng Telugu osangkaket ka nung inyakdangba sülen advocate akümtsü telemtetba agia liasü.

2001 küm pa Andhra Pradesh High Court nung judge shim, 2013 küm September ita

nung Delhi High Court nung chief justice shim aser tesüsa 2014 küm February ita nung Supreme Court nung judge shima liasü.

Tang High Courts aser SC nung menden tazüng aika lir, anungji menden tazüng atema judges shimtsüji Justice Ramana atema tayongzükba tulutiba asütsü.

Amnesty Intl.-i India nung meimchir temeden anema inyakba aitsü

London, April 07 (Agencies): Amnesty International-i sangdongba report ka nung, coronavirus anema linük shibangba mapang nung India-i nüburtem timtemdaksüba, CAA anema longkak aiterem aser aluyimba ozüng anema longkak aiterem dak tashiyim amshiba, Delhi nung rara adokba aser Kashmir nung senso temeden alema inyakba aija lir.

Amnesty International indang report, "The State of the World's Human Rights 2020/2021" nung linük 149 nung meimchir temeden jenjang asadanga osang tejangja lir.

Iba report section ka nung India indang metetdakja lir, "Tamangba yimsü minorities amakba aser tepsetba dak sendakba nung mitkartem aser police ketdangsertemi aibelenertem anema meinyakba tatalokba aika lir."

Coronavirus prokba nokdangtsü atema linük shibangba dak sendakba nung, "March ita nung (yaküm) telatetbatem mebenshiba

atema police-i bendanglen aayangertem merenshia ali nung apua jajadaksü. Tenokdangba anema inyakba atema apurtem timbaka sensakertem aser meshimejungertem lir," ta report nung shia lir.

Kasa report nungsa, Modi-i aniba sorkari Jammu & Kashmir nung Arrla 370 agiena union territories ana kümstüba sülen küm ka süiaka meimchir temeden balala magütsür aser communications services maneni nokdang; India sorkari ola adokertem tebang nembangtsür aser union territory nung osangbenertem anema inyaker, J&K nung India police-i osangbener 18 dak azük mesüra police station-i jaoka liasü, ta metetdaksü.

Amnesty International-i ashiba agi, yaküm August ita nung Indian Parliament nung aluyimba ozüng tasen asem agizükba sülen aluyimer 160 dak tema süogo; longkak aitba mapang aluyimer kar soseta asü, kar temelungjang tashidak agi asü aser kar gari lenmang lendong nung asü.



New Delhi, April 07, 2021: Rafale tayimtsü alitsü atema tezüngtep agiba dak sendakba nung sübokrem agiba osang ka prokshiba sülen New Delhi nung Indian Youth Congress züngsemtemi iba ken o bushisüngdangtsüla, ta takhangba agüja longkak aitba noksa nung angur.

Myanmar sepaitemi longkak aiter nisung 13 tepset



Yangon, Myanmar kübok Hlaing Thar Yar township nung aliba JOC Galaxy (Myanmar) Apparel Co. nung April 7, 2021 nü mi janrua aliba mapang tangokba noksa ka yangi angur. Myanmar nung mitkartemi sorkar atsüngdokba maparen China-i busemer ta mepelai longkak aiter temi China nung indang factory kar nung Bodhbarnü mi senlokja liasü.

Naypyitaw, Rongchii/April 07 (Agencies): Mitkar tashi amshia sorkar atsüngdokba anema Bodhbarnü longkak ater dak Myanmar sepaitemi injang khalokja nisung tajemba agi 13 tepset aser aika yirutsü, ta osang balala ajanga ashir, aser kasa mapang Yangon nung ola tesashi adoka apokba den China nung meyong factory nung mi senlokja liasü.

Iba linük nung mitkar tashi amshia yimsü asürtemi, civil disobedience movement ajanga Myanmar raksatsür, ta ashi.

February 1 nü mitkartemi sorkar atsüngdokba sülen Myanmar nung rongrongshirong tulu adoka aruba mapang nisung 580 dak tema tepsetogo, ta activist telok kati ashir. Mitkartemi tashiyim amshiaka linük tesem ajungalen

longkak aiter manener aser tali ang akumer.

Linük northwestern tsütsü Kale jila nung longkak aiter temi Aung San Suu Kyi'er civilian sorkar tanaben amenokshijang, ta takhangba agüja Bodhbarnü longkak aita alidak sepaitemi injang khaloktsü, ta ashir.

Iba tesem nung nisung 11 asü aser aika yiru, ta yangi alir aser Myanmar Now osang ajanga ashi.

Ano Yangon anasa Bago jila nunga longkak aiter ana tepset, ta Myanmar Now ajanga ashi.

Yangon nung sorkar meyong ki kar, military hospital ka aser shopping mall ka nung densema tesem balala nung tenetben ola adoka apokba angashiogo.

Teka agi yangluba 'sound

bomb' tem amshiba osang angashia lir, ta Yangon nung aliba US Embassy ajanga ashi.

Yangon nung China nung meyong JOC Garment Factory nung Bodhbarnü mi adok, ta Fire Department ajanga ashi. Iba lendong nung asü-amaba osang mali aser teraksa agütsüba tejangja shia mali.

Ano Yangon nungsa tesem ka nung activist temi China nung nisan nung mi senloktsü noksa Facebook nung anguogo.

China nung ya mitkar lenirtem busemer ama züngshir aser taoba ita Yangon nung China nungeri sen indoka aliba factory 32 raksaja liasü.

Mitkartemi broadband internet aser mobile data service tem shibanga aliba ajanga lendong ya tejangja monguteter.

North Korea nung tensa tamajungtiba ajangshia lir: Kim

Seoul, Rongchii/April 07

(Agencies): North Korea nung tensa tamajungtiba ajangshia lir, anungji ruling Workers' Party indng "grassroots" züngsemtem tali teyakyakba asütsüla aser linük indang five-year economic plan tasenba khuret süa abentsüla, ta Kim Jong Un-i ashi.

Kim-i yimsü asü tenzüker küm ter ajungba mapang North Korea nung tenokdangba ajanga rongsenketsüng alener alidang coronavirus lockdown ajanga jenjang tali tamajungba kumshir lia iba osang ya state media ajanga Bodhbarnü sangdonga liasü.

Mongulbarnü Workers' Party indang cell secretary tem senden ka tenzüker mapang Kim-i iba o ya ashi, ta North Korea indang Korean Central News Agency ajanga ashi.

"Tensa tamajungtiba nunga süaka asenoki timtem zünger mezüngmai ajurubatem ajangtetsü asoshi cells aser party indang grassroots organisation temi shilem agiba ajanga nüburtem libaliru jenjang tajungba kumdaktsüsü," ta Kim-i ashi.

Pai züngsemtem dang January ita party congress nung telemtetba agia aliba mapatem inyaktü ajungshi, kong pai küm pongu sentong metetdaktü aser rongsenketsüng renloktsü asoshi pai yangluba sentongtem nung takok mangur, ta shia liasü.

January congress nung Kim-i nuclear aser ballistic missile sentongtem tali ulushitsü nangzüka liasü.

Mongulbarnü mungdang



aliba nung nisung 10,000 arua aden aser item rongnung production sites amala sector nungi party cell secretary, senior provincial party ketdangsür aser city party committees nungi chief secretary tem dena lir, ta KCNA ajanga ashi.

Iba sentong nung jembiba mapang, party indang grassroots unit temi metokmeperi inyakba asoshi Kim-i aitsü aser party tali renloktsü asoshi item aibelen tekeratiba nung metongshitsü ashi.

Party cells nung züngsem pongu nungi 30 tashi lir, koba party tashi amshiba unit tilatiba lir, koba ajanga factory inyakyim ketdangsür. Iba network ya Workers' Party atema kanga tongtipang lir. Cell secretaries indang mungdang ya 2017 küm tatemsa agia liasü.

Rongsenketsüng nung tetsükdaktü ajuruba ajanga Kim-i taoba US Tir Donald Trump den tesendaktep yanglutsü merangba asoshi kecha mesayuteter, koba North Korea-i denuclearization mera atema tenokdangbatem agentsü onük nung tangatetep kati maruteti anendak.

COVID-19: Brazil nung ghonda 24 tsüngta nisung 4,000 dak tema asü

Brasilia, Rongchii/April 07 (Agencies): Brazil nung ghonda 24 tsüngta COVID-19 tashidak den sendaktepa asüba nisung 4,000 dak tema liasü, kong tali temelaba menatepa aoba virus tabu ka agi cases tali kumdaktsür.

Mozüki nung nisung masemer, aser yimti kar nungbo temang anepalutsü atatepdang asür, aser tesem aika nung health system telaor lir.

Iba linük nung COVID-19 agi nisung asüba 337,000 tajunger lir, aser ibai US sülen jenjang tanabuba nung alitsü.

Tir Jair Bolsonaro-i iba tashidak azüoktsü asoshi lockdown meratem maneni anema nokdaker.

Pai virus agi kongshiba dang nungi rongsenketsüng nung kongshiba ya tamajungba asütsü, ta ashir aser court nung ketdangsür kari tenokdangba agüja alibatem melenshitsu merang.

Mongulbarnü tir aliba kima

pa busemer den jembiba mapang pai quarantine asüba aitsü aser kuli kecha magütsü item ya pokshi-inshi aser tekolok anibelemba den sendaktepa lir, ta ashi. Ajisüaka pai tesüba ghonda 24 tsüngta nisung 4,195 asüba indangbo mejembi.

Tanü tashinung coronavirus agi Brazil nung nisung million 13 dak tema menepa lir, ta health ministry ajanga ashir. March ita COVID-19 agi nisung 66,570 shi süogo, koba taoba ita dang anasü agi timba lir.

"Tashidak wara azüoktsü asoshi linük balalai merangba atema tangbo Brazil ya lendong ka kümogo," ta Dr Miguel Nicolelis-i ashi, shibai linük nung COVID-19 cases kanga junga mita asadanga arur.

"Brazil mazüoktetra, alima kumzüka mali, kechiaser hopta shia variant tasen adoker... aser item ya arrtsü alemtsü," ta

pai ashi.

State timba nung COVID-19 agi shirangertemi intensive care unit yipten shilem 90 dak tema amshir, ta health institute Fiocruz ajanga ashir.

State kar nung oxygen aser sedative agi anüngba osanga lir. Saka iba ama tensa nung liaka yimti aser state kar nungbo nüburtem senzüsempo nokdanga aliba salar.

"Tir Jair Bolsonaro-i lockdown anema nokdakba nung takok nguogo. Mayor aser governor temi social distancing policy benoktsü memelar, kechiaser shishilembar lenirtem dena tir busemertemi item mera taksatsütsü ta parnoki meteta lir," ta Brazil indang Institute for Health Policy Studies nung executive director Miguel Lago-i osangbener dang ashi.

Bolsonaro-i iba virus ya süoki ia magizük aser mozü nunga tamang makaba jembi

asir junga masadangi mozütem agiba ajanga pa jenjang tamajungba akum.

Tawa pai mozü agütsüba maparen asoshi temelenshiba nung jembi aser 2021 ya mozü agütsüba küm ka asütsü, ta nangzüker. Saka iba linük nung COVID-19 mozü nüburtem nem agütsü tenzüktü mokokteti lir.

Brazil nung nütsüng yongsük shilem 8 dang mozü ya dose ka agütsür lir, ta Our World in Data tracker ajanga ashir. Mozü alitsü asoshi sorkari jembishinüba nung kanga anü-alemer, ta aikati ashir.

"Tang agütsüba yimya nung mozü agütsüra, kanga kera menatepa aoba virus ajemdaktsüsü asoshi anogo 20 bo linük shibangtsüla," ta Epidemiologist Ethel Maciel-i osangbener dang ashi.

P.1 mesüra Brazil variant ya densema linük nung coronavirus tabu 92 jangjateta lir, aser item ya tali temelaba

menatepa aor ta bushiteta lir, ta Fiocruz-i ashi.

Iba Brazil variant ya Amazonas state nung November 2020 nung pokteta state yimtiba, Manaus nung kanga kera prokshia ao, ta asadangteta lir, aser iba cases ta January 2021 nung shilem 73 liasü.

Brazil variant kanga kera renlokba ajanga ita ishika tsüngta cases tali akumtsü, ta mongintemi ashir.

Brazil-i coronavirus azüoktsü asoshi mera agiba ya ajanga ajungbener takoksa tulu agütsütsü. Brazil nung puti otsü nung nisung meimchiri lendong tamajungtiba ajurubaji ibai alitsü, ta Dr Nicolelis-i ashi.

"July 1 tashinung coronavirus agi asen linük nung nisung 500,000 tashi asütsü. Saka tang amai menatepa aoba manenra nisung 600,000 tashi asütsü, ta University of Washington ajanga asadangteta lir," ta pai ashi.

PELAR



Aso: 12.02.1973
Asü: 25.03.2021

Asür **LIDEN PONGEN ALIBA** (Police Wireless) mapang tatsüka shiranga lir 25.03.2021 nü alima nungi pila ogo. Pa shiranga aliba mapang nungi tenzüka pa asüba anogo aser ano tasü mang yim tonga meinoktsüba tashi shirisa rongsen, nübo, shisatsü aser sarasadem agi yariogo nenok ajak dang tebang ai meshitetba tepela metetdaksür. Nenok mapa tajung asoshi teyanglur Tsüngrem-i moajangma.

~ Kinungtsü, chirnurtem aser kinüngertem.



BILEMTETER



N.LIKOK JAMIR (1918 - 08/04/2010)
AKOINLA (1931-08/04/2020)

Tanü ama kasa anogo nung ojala aser ala alima tembanger ka ken ka ken ta onok nungi pilaogo. Aji saka tena sayu o tajung aser temeim mapatem onok molungjang nung teti lir.

Kibubai maneni nena tanüla anisüngzük aser tepela nung tokjangma ta onok sarasadem.

~ Temeim kinüngertem.

SÜR KÜM TER AJUNGBA BILEMTETER



Tasoba:
14/02/1940

Tasüba:
08/04/2011

Late P. B. Wati (Akhoya)

Küm ter na iba alima nungi pilar onoki tatalokba aika ajurua aodang na akümüli nung alidang nai sayuba lemangtem ajanga onok temoatsü teti angur. Ano na onok den iba akümüli nung meliaka temaba nungi temoatsü teti agütsüa obala Tsüngrem den liangma.

Temeim kinüngertem.

ZWSK 25buba anniversary Kronu-i moatsü



Neiba Kronu aser tanga ketdangsertem April 6 nü Kohima nung ZWSK 25buba Anniversary nungshilong sayatsüba mapang tangokba noksa nung angur.

Aluyimba nung temulung agüja shilem agitsü nungdakba indang jembidang pai aluyimertem dang sorkari akokba tashi shishilembadak balala den sendakteptsütsü nangzüka liasü.

Kasa mapang nung Chakhesang Public Organization (CPO) tir Mikha Kenye aser Zapami Village Council chairman Zewekha Wetsah natia sentong nung o tatsütsü jembia.

ZWSK amenoker küm 25 ajunga benjungmung sentong ya Neisa Wetsah lenisüba kübok agi aser ZWSK chairman Lhiwekulo Kenye-i lokti pelaa agizükba o jembia liasü.

Maneni sentong nung ZWSK Building Committee convenor Er. Lhiwepe Khutso aser ZWSK general secretary Wepre Wetsah nati inyakyim balala osang agütsü aser ZWSK vice chairman David Khutso-i tepela anküp o jembia liasü.

Kohima, Rongchii/April 7 (TYO): 25buba Zapami Welfare Society Kohima (ZWSK) anniversary benjungmung nung planning & coordination, land revenue and parliamentary affairs minister Neiba Kronu-i alaketa jaoker liasü. Iba sentong ya April 6

nü Para Medical Colony, Kohima nung agiogo.

Kasa anogo Kronu-i ZWSK ki semzükja liasü. Sentong nung o jembibida mapang minister-i, Zapami lokti shisa akaba aser bendanga agüja meranga inyakba ajanga lenla balala nung takok tajung ngutetba atema tenüsang agütsü.

Paisa, Zapami lokti-i Zapami yimtsüng nung museum ka amenoka sobaliba aser libaliro wazüka ayuba atema kanga pelaba lemsatepa liasü.

Gari senzügenpongtsü tetuyuba agütsü

Dimapur, Rongchii/April 7 (TYO): Khouchiezie (Local Ground Kohima) nung April 9 nü asayatsü aliba 13buba Open Naga Wrestling Championship 2021 asayaba mapang yimti nung gari senzügenpong nung tetsükdaksü madoktsü atema, asayamung nung shilem agirtem, ketdangsertem aser asaya reprangi arurtem dang parnok gari City Centre (Old MLA Hostel compound) nung anendena ayutsü metetdaksüogo.

Temelaba agütsür aliba garitem ground telungi Southern Gate nungi dang aitaidsütsü. Razhü Point (Police Point) nungi Northern Gate, Khouchiezie (Local Ground Kohima) tashi nung gari anentsü memelatsü.

Coronavirus wara... (Tapak 7 nungi...)

Linük nung coronavirus agi teshirangdakpur timba-timba kümдар aser iba tashidak agi asürtema timba kümдар, ta pai ashi.

Tawa iba wara tali prokshiba kuli rongnung tulubaji lokti tulu adenshiba ajanga lir, ta pai ashi.

Union Health Secretary, Rajesh Bhushan-i, coronavirus agi teshirangdakpur timba aliba district ter rongnung Chhattisgarh kübok Durg district densema lir, district tenet Maharashtra nung lir,

Karnataka nung ka lir aser Delhi-a district ka ama züngshir, ta metetdaksü.

Tang tebilemstü tulutiba aliba state temji Maharashtra, Punjab aser Chhattisgarh lir, ta pai ashi.

Tersüiba ghonda 24 tsüngda India nung ano nisung 1,15,736 dak coronavirus putetogo aser nisung 630 süogo; tang tashi nung iba tashidak agi nisung ajak agi 1,66,177 süogo, ta Bodhbarnep Union health ministry-i metetdaksü.

MENUNGRA BILEMTETER

Late Moarenba Jamir (Khar)

08/04/2019

Nai onok toktsür tanü küm ana abensar. Nü temeim aser mapa tajungtem onoki kodanga mamatsü. Onoki na menguaka, na onok mulungjang nung teti alitsü.

Temeim kinungtsü,
chirnur aser
kinüngertem



DECLARATION

I, Shri. L. Meren R/o Chümoukedima, Dimapur in the district of Dimapur, Nagaland do hereby solemnly made declaration and affirm on oath before the Notary Public Dimapur vide Regd. No.5568 dated 13.03.2021 declaring that I shall under no circumstances will be held responsible for any civil or criminal liabilities if charged against my daughter **Ms. sentinaro** age about 36 years in connection with her personal or business affairs as it was done without my knowledge and consent. And furthermore, I URGES UPON ANY INDIVIDUAL/ORGANIZATION/ASSOCIATION ETC NOT TO ENTERTAIN ANY FORM OF LOAN OR MORTGAGE CHARGE, LEIN AND OR NON MONETARY TRANSACTON WITH MY DAUGHTER MS SENTINARO. An in the event of any transaction with her shall be doing so at his/her own risk and for which I shall under no circumstances will be held responsible since I do not ratify her act in any manner whatsoever.

Regd.No. 5568/2020. Dated: 13/03/2020

M. GLORY SEMA
Notary Public
Area Nagaland. Regd. No.96/2016

Declarant
L. Meren
Chumoukedima

YRS-i state level sobaliba asaya tetoktepba ayongzüksü

Dimapur, Rongchii/April 7 (TYO): Directorate of Youth Resources and Sports-i Indira Gandhi Stadium, Kohima nung April 8 aser 9 nü 2buba sobaliba asaya tetoktepba ayongzüksü asayatsü renema lir. April 8 nü asayamung lapokba sentong nung Advisor YRS, Zale Neikha alakteta jaoker asütsü aser April 9 nü asayamung shibangba sentong nung Commissioner & Secretary, YRS, Alun Hangsing alakteta jaoker asütsü.

World Athletics Relays atema Indian Squad sangdongogo

Rongchii/April 7, 2021 (Agencies): Küm ana shi temaba jenjang nung asayaba asayamung ka nung danga shilem magiba sülen India nung asemteper 20, May 1 aser 2 nü Chorzow, Poland nung World Athletics Relays nung shilem agiba mapang parnok indang form aser fitness tendangtsü.

Athletics Federation of India (AFI)-i 4x100m relay squad tashitait ka sangdongogo, kong Dutee Chand, Hima Das aser S Dhanalakshmi shibai March ita Federation Cup nung Chand ajateta liasü, parnok ajak densema lir.

AFI chief Adille Sumariwalla-i, "Covid wara ajanga tetsükdaksü adokba sülen linük nungi asyartem mezüngbuba international

Bruyne-i Manchester City den tenangzüktepba yanglushiogo



Rongchii/April 7, 2021 (Agencies): Kevin De Bruyne-i Manchester City nungi ano küm ana asayatsü atem tenangzüktepba tasen yanglushiogo, ta Premier League club yagi Bodhbarnü metetdaksü. Pa City nungi 2025 küm tashi asayatsü.

Belgium nung international asayar indang contract 2023 tembangtsü liasü. Pa arishi küm 30 jungogo aser pa career nung tanungba mapang timba Etihad Stadium nung dang intoktsü atema telemtetba agiogo.

2015 küm Wolfsburg nungi arua adenba sülen De Bruyne-i City nung kanga takok ngua asayadar aser tang tashi nung asayamung tongtibang tenet kokteta lir, koba iba season parnoki asayamung

pezüprongla kokra 11 ajungtsü. "Ni kanga pelar. 2015 küm City nung arua adenba sülen ni kidang ama dang bilemer. Ni fan tem meimer, ozü kibong Manchester nung amenoker lir aser kü asaya yimya kanga junga renlokogo," ta De Bruyne-i ashi.

"Iba football club ya takok asoshi renema lir. Ni tajungtiba nung asayatetsü atema nungdakba ajak iba club yagi agütsür, anungji tenangzüktepba tasen yanglushitsü atema tasak masü asü.

"Ni kü indang career nung tang tajungtiba asayaba mapang lir aser iba dak aliabo tajungba marutsü ta bilemer," ta pai ashi.

Paisa, pa aser manager Pep Guardiola na football asaya yimya tangatetba kasa dang ta ashi.

"Manager ka den tensesdaktep tajung alitsüji ni atema kanga tongtibang, kechiyong onok nukjidong kasa dang aser onok taginüba kasa dang," ta pai ashi.

City director of football Txiki Begiristain-i, De Bruyne ya alima nung asyartem rongnung tajungtiba ka ta tenüngsang ashi.

"City-i aruba sülen pa asaya yimya temelenshi melei kanga junga asayaa arudar aser taoba küm ishika tsüngda pa asyartem rongnung tajungtiba ka kümogo," ta pai ashi.

"Pa sempet dak sendakba nung tashishitsü kecha mali, saka ano pa professional ka lir aser Manchester City nungi asayaba mapang pai bendanga agüja asayaba ya tushitsü langa lir," ta paisa ashi.

Sania Mirza TOPS nung züngoksemogo



New Delhi, Rongchii/April 7 (Agencies): India nung nungtugu tennis asayar Sania Mirza Bodhbarnü sorkar indang Target Olympic Podium Scheme (TOPS) nung züngokemogo. Küm pezü tejakdang lai iba sentong magitsü atema telemtetba agiba sülen taküm züngoksemogo. Mission Olympic Cell 56buba senden nung TOPS nung Sania züngoksemtsü atema shima liasü.

Grand Slam aiben koker aliba arishi küm 34 tain asayari 2017 küm la iba scheme atema shimba magizük, kechiyong la yirur liasü. "Auh Sania TOPS list nung züngoksemogo," ta Sports Authority of India source kati PTI dang ashi.

Sania mashisa akümba ajanga asaya nungi mapang tatsüka atema anena mata tsüngda ranking protection aliba ajanga la Tokyo Olympics asoshi Sania qualify süadoker liasü.

Sania tang jenjang 157buba nung lir, ajisüka WTA temzüng

Bengaluru FC nungi asayar aser staff 3 dak COVID-19 potetogo

Rongchii/April 7, 2021 (Agencies): Indian football club Bengaluru FC-i Bodhbarnü club nungi asayar aser staff asem dak COVID-19 tashidak potetba metetdaksüogo. April 14 nü asayatsü aliba AFC Qualifiers (Preliminary Stage Two) atema training asoshi adenshiba mapang tashidak keta alirtem poteta liasü.

Tashidak keta alirtem ya BFC training camp mapang potet, koba April 5 nü tenzüka liasü.

"Goa nung tatemsa Blues' camp nung COVID-19 tashidak tendangba mapang asayar aser staff asem dak tashidak potetogo," ta club-i parnok indang Twitter handle ajanga lemsatetp.

"Bengaluru FC-i maneni tekümzükbakü bok alitsü atema takok tashi temaba jenjang nung jenjang tapet agitsü," ta kasa sangdong ajanga metetdaksü.

April 14 nü BFC, Nepal Army Club mesera Sri Lanka Police den GMC Stadium, Bambolim nung asayatsü.

Hopta ishika tejakdang BFC captain aser India nung nungtugu asayar Sunil Chettri dak COVID-19 tashidak poteta liasü, ajisüka pa anepogo.

Taoba ISL league stage nung BFC jenjang tenetbuba nung tembanga liasü.

Taküm ISL nung BFC-i, asaya pongu akokba den asaya tenet kasasa nung tembang aser asay ti mekoki point 22 nguteta liasü.

BILEMDANGANG

"Pelaa alitsü ya nü inyaksangshi dak keta lir."